



KONA-BA ASINA AKORDU DELIMITASAUN FRONTEIRA MARITIMA ENTRE TIMOR-LESTE HO AUSTRALIA IHA NOVA IORKE, 6/3/2018

MANUEL MESQUITA PEREIRA · WEDNESDAY, MARCH 7, 2018

Presidente Parlamento, Vises Presidente, Sekretariu no Vices Sekretariu Meza, Deputadus no Deputadas, funsionarius, media publiku no povu Timor Leste tomak neebe mak ami serbi no hadomi,

Excelencias,

Loron ida ohin, loron ida importante tebes ba povu no nasaun Timor Leste, tamba liu husi loron ida nee Timor leste ho nasaun vizinu Australia asina akordu delimitasaun fronteira maritima entre nasaun rua iha Nova Yorke, Timor Leste representa husi Excelencia Sr. Agio Pereira, Ministru Adjuntu Primeiru Ministru ba Asuntu Delimitasaun Fronteira Maritima Timor-Leste nian no Excelencia Sra. Julie Bishop Ministra Negosiu Estranjeiru Australia nian, neebe asiste direktamente husi Sekretariu Jeral ONU, Antonio Guterres.



Search

Leste nian. Ho akordu delimitasaun neebe atinzi liu husi negosiasaun ida naruk, susar no kustu ida bot Timor-Leste hetan dunik nia objetivu hodi defende soberania no riku soin.

Liu husi deklarasaun nee, bankada CNRT, PLP no KHUNTO neebe halibuar-an iha Aliansa Maioria Parlamentar (AMP) hatoo agradesimentu bot ba:

1. Ekipa Negosiasaun Timor-Leste nian, neebe lidera husi Maun Boot Kay Rala Xanana Gusmão neebe halo esforsu tuir lei internasional hodi konsege atingi akordu delimitasaun fronteira marítima Timor-Leste ho Australia, kona-ba delimitasaun fronteira marítima ida permanente;
2. Agradese mos ba Presidente Komisaun Konsiliaun, Sua Excelensia Embaxador Peter Taksøe-Jensen, neebe hanesan representante Sekretariu Jeral ONU hodi lidera negosiasaun nee ho diak, no asina iha lora 6/3/2018, iha Nova Iorque, Estadus Unidus Amerikanu (EUA);
3. Ekipa negosiasaun husi Australia, Governu Australia, povu Australia no Veteranus Australia tomak neebe partisipa no fo apoiu maximu durante prosesu negosiasaun nee ho diak, no bele iha konsensus ida hodi konkorda delimitasaun nee tuir lei internasional kona-ba linha fronteira marítima entre nasaun rua nee;
4. Ba juventude Loriku Asuwain no NGO's neebe organiza manifestasaun, protestu no asaun pasifiku sira hodi fo apoiu ba ekipa negosiasaun neebe Xefia husi MB Kay Rala Xanana Gusmão too prosesu final;
5. Agradese mos ba Amu Bispo Dioseze Dili, Baucau no Maliana, Amu Paroku no mos sarani sira hotu neebe halo asaun liu husi reza, missa no asaun seluk tan hodi fo apoiu no husu tulun husi Maromak nian atu negosiasaun bele hetan susesu.

Susesu neebe atinje nee mai hosi esforsu juventude, povu, sarani no relijiozus, reliziosas, veteranus no lia nain sira neebe namkari iha Timor Laran tomak no iha estrangeiru. Tamba nee mai ita hamutuk fo agradesimentu ba Maromak, tamba ho Maromak nia tulun, ba heróis no martires sira neebe fo sira vida ba soi ukun an ida ne, mak Timor-Leste konsege no atingi delimitasaun definitiva fronteira marítima ho Australia neebe mundo no timor oan barak duvida ita nia kapasidade atu altera akordu neebe halo ba tinan 50. Felizmente oras tuku 7.00 (tersa feira 7/3/2018) dader oras Timor-Leste no tuku 17.00 loraik oras Nova Iorque (6/3/2018) asina ona akordu foun ba delimitasaun fronteira marítima entre Timor-Leste no Australia nian.

Povu Timor Leste neebe ami hadomi,

Wainhira Ekipa Negosiador neebe representa ONU anunsia data ba asina akordu iha Nova Yorke iha lora, 6/3/2018, mosu komentariu iha media sosial neebe kestiona kona ba kustu neebe boot hodi selu advogadu ka kustu por volta de \$ 40 milhoes. AMP lamenta tebetes ho hahalok ida nee, tamba la hare ba sucessu neebe Timor-Leste atinji, maibe kestiona fali mak ninia valor neebe gasta hodi atinji resultado nee. Ho lia hirak nee halo ami hanoin fali ba MB Kay Rala Xanana Gusmão ninia intervensaun ida iha tinan hirak ba kotuk kuandu hahu atu koalia ba negosiasaun ba delimitasaun fronteira marítima nee. Maun Boot Xanana dehan,

“SE DURANTE TINAN 24 NIA LARAN ITA LAKON EMA RIHUN ATUS RUA RESIN HODI DEFENDE UKUN-AN, AGORA IHA OSAN NUSA MAK LA HODI SELU ADVOGADU DIAK IHA MUNDU HODI DEFENDE ITA NIA SOBERANIA.”



Tamba nee ami husu ba Timoroan hotu, liu-liu ba líderes sira labele hare ba valor osan neebe gasta maibe hare ba rezultadu neebe Timor-Leste hetan ka atinji. Nasaun barak iha mundu atu defende ka atingi sira nia interese ka defende sira nia direitu liu husi funu no disputa ida naruk too ema balu tenki mate. Maibe Timor-Leste nian atinji ho deit negosiasaun ida pasifiku no iha mesa leten laos ho forsa ka funu.

Iha balu mos liu husi media sosial hateten katak, akordu CIMATS fo margem ba atu negosia fali liu tinan 7, sim nee los duni, maibe ba deit kontratu explorasaun mina iha posu Greater Sunrise, laos atu negosia fali kona-ba delimitasaun fronteira marítima, tamba tuir akordu CIMATS delimitasaun fronteira marítima so bele negosia liu tia tinan lima nulu, ida nee mak los. Se mak iha duvidas bele ba hare iha akordu CMATS nee rasik.

Membru da Meza, distintos deputadus no assistentes sira,

Ami hato ami nia lamentasaun kona-ba oferta, neebe Australia hakarak fo 100 milhoes, se Timor Leste aseita dada kadoras ba Darwin invés de dada mai timor. Dala ida tan mai ita hotu fo agradesimentu profundu no kongratula Maun Boot Kay Rala Xanana Gusmão no nia ekipa neebe ho seriedade no firmeza partisipa iha negosiasaun nee too hotu no Timor-Leste atinji no kompleta tan ninia soberania iha tasi laran.

Ikus liu, ami husu ba Presidente Parlamento Nacional atu tau iha konsiderasaun hodi ajenda lalais plenaria extraordinariu ida neebe konvoka Deputadus Parlamento nacional hotu atu ratifika akordu ba Delimitasaun Fronteira Maritima entre Timor-Leste ho Australia neebe ohin asina tiha ona. Ba asuntu ida nee, ami husu dala ida tan atu Presidente Parlamento Nacional realiza iha tempu badak mai.

Parabens ba Ekipa Negosiasaun ba Delimitasaun Fronteira Maritima TL nian;

Viva Maun Boot Kay Rala Xanana Gusmão;

Viva Povu Timor Leste.

Dili, 7 de Marsu de 2018

Lori Bankada CNRT, PLP no KHUNTO nia naran.